

ԱՇԽԱՐՀԱԳՐԱԿԱՆ ՄԻՋԱՎԱՅՐ, բնու-
թյան այն առարկաների ու երևույթների
ամբողջությունը (հողը, ջուրը, բուսական
ու կենդանական աշխարհը, երկրի ընդեր-
քի հարստությունները, էներգիայի աղ-
բյուրները, մթնոլորտի ստորին շերտը,
կլիման), որոնք անմիջականորեն կապված
են մարդկային կյանքի հետ, մասնավորա-
պես ներառված են հասարակական ար-
տադրության ոլորտի մեջ՝ կազմելով հա-
սարակության գոյության ու զարգացման
բնական անհրաժեշտ հիմքը: Պատմական
զարգացման զուգընթաց Ա. մ-ի շրջանակ-
ներն ընդլայնվում են, բնության նորա-
նոր մասեր ու երևույթներ են ներգրավվում
հասարակական կյանքի մեջ: *Աշխարհա-
գրական ուղղության* ներկայացուցիչները
գերազնահատում են Ա. մ-ի դերը, այն
համարում հասարակական զարգացման
վճռական գործոն: Մարքսիզմը, մերժելով
այդ տեսակետը, միաժամանակ ընդունում
է Ա. մ-ի որոշակի դերը հասարակության
կյանքում: Ա. մ., լինելով բարենպաստ կամ
անբարենպաստ արտադրողական ուժերի,
արտադրության առանձին ճյուղերի զար-

գագման համար, դրանով իսկ արագացնում կամ դանդաղեցնում է հասարակական զարգացման ընթացքը: Ընդ որում, Ա. մ-ի այդ ազդեցությունը միշտ էլ միջնորդավորվում է հասարակական հարաբերություններով և պատմականորեն փոփոխվում է: Տասարակությունը, ավելի ու ավելի լայնորեն օգտագործելով բնության ուժերը, հետզհետե դուրս է գալիս բնությանն ստրկացված լինելու վիճակից: Տասարակական կյանքում գնալով ավելի մեծ դեր է սկսում խաղալ Ա. մ-ի այն մասը, որն անմիջական հիմք է ծառայում աշխատանքի միջոցների ստեղծման համար (օգտակար հանածոները, էներգիայի աղբյուրները), քան այն մասը, որն անմիջական հիմք է ծառայում կենսամթերքների արտադրության համար (բուսական և կենդանական աշխարհը, բերրի հողը): Ա. մ. ինքը ևս փոփոխություններ է կրում (թեև դանդաղ) թե՛ հասարակության ազդեցությամբ և թե՛ նրանից անկախ:

ԱՇԽԱՐՀԱԳՐԱԿԱՆ ՑԻԿԼ, գեոմորֆոլոգիական հասկացություն՝ տրված Ու. Մ. Դևիսի կողմից, XIX դարի վերջին: Ըստ Դևիսի, ռելիեֆի բազմազան ձևերի առաջացումը պայմանավորված է երկրաբանական կառուցվածքի և արտաձին պրոցեսների փոխազդեցությամբ՝ որոշակի ժամանակաշրջանում: Այս վերջինն էլ նա անվանում է Ա. ց., որի ընթացքում սկզբնական բարձրադիր ռելիեֆն աստիճանաբար մասնատվում է, դենուդացիայի ենթարկվում և վերածվում *պենեպլենի*: Ա. ց-ի ընթացքում ռելիեֆի զարգացումն ապրում է «երիտասարդության», «հասունության» և «ծերության» փուլեր: Միայն երկրակեղևի նոր տեկտոնական բարձրացումները կարող են երիտասարդացնել ռելիեֆը և սկիզբ հանդիսանալ նոր Ա. ց-ի: